

清·汪輝祖撰

紹興先正遺書

元

史

本

證

(一)

文海出版社

有限公司
印行

元史本證序

讀經易讀史難讀史而談褒貶易讀史而證同異難證同異於漢魏之史易證同異於後代之史難昔溫公資治通鑑成惟王勝之假讀一過他人閱兩三紙輒欠伸思臥況宋元之史文字繁多雖頒在學官大率束之高閣文多則檢閱難周又鮮同志相與商榷者則鑽研無自卽有譔述世復不好甚或笑其徒費日力史學之不講久矣僕少時有志於此晨夕攜一編隨手紀錄於元史得攷異十五卷自媿按索未備今老病健忘舊學都廢頃汪君龍莊以所著元史本證若干卷寄示竊喜天壤閒尙有同好而龍莊好學深思沿波討源用

力之勤勝於予數倍也本證之名昉於陳季立詩古音然吳
廷珍新唐書糾繆已開其例矣歐宋負一代盛名自謂事增
文簡旣精且博廷珍特取記志表傳之文彼此互勘而罅漏
已不能掩若明初史臣旣無歐宋之才而迫於時日潦草塞
責兼以國語繙譯尤非南士所解或一人而分兩傳或兩人
而合一篇前後倒置黑白混淆謬妄相沿更僕難數而四百
年來未有著書以規其過者詎非藝林之闕事歟廷珍求入
史局弗得年少負氣有意吹求其所指摘往往不中要害龍
莊則平心靜氣無適無莫所立證誤證遺證名三類皆自據
新得實事求是不欲馳騁筆墨蹈前人輕薄褊躁之弊此所

以有大醇而無小疵也攷史之家每好按錄傳記小說矜術
奧博然羣言殽亂可信者十不二三就令采擇允當而文士
護前或轉謂正史之有據茲專以本史參證不更旁引則以
子之矛刺子之盾雖好爲議論者亦無所置其喙懸諸國門
以待後學不特讀元史者奉爲指南卽二十三史皆可推類
以求之視區區評論書法任意褒貶自詭於春秋之義者所
得果孰多哉

嘉慶七年歲次壬戌四月辛丑朔嘉定錢大昕書

予錄三史同名閱元史數周病其事跡舛闕音讀歧異思欲
略爲釐正而學識淺薄衰病侵尋不能博攷羣書苟按逸事
爲之糾謬拾遺因於課讀之餘勘以原書疏諸別紙自丙辰
創筆迄於庚申流覽無閒刺取浸多遂彙爲一編區以三類
一曰證誤一事異詞同文疊見較言得失定所適從其字書
爲刊寫脫壞者弗錄焉二曰證遺散見滋多宜書轉略拾其
要義補於當篇其條目非史文故有者弗錄焉
如藝文志國語解之類
三曰證名譯無定言聲多數變輯以便覽藉可類求其漢語
之彼此訛舛者弗錄焉凡斯數端或舉先以明後或引後以
定前無證見則弗與指摘非本有則不及推詳爰取陳第毛

詩古音攷之例名之曰本證曩者三史同名錄草槁初成子繼培復爲增補因將證名一門并令校錄有及證誤證遺亦錄之時賢訂元史者錢宮詹攷異最稱精博戊午暮秋始得披讀凡以本書互證爲鄙見所未及者悉采案詞分隸各卷不辭誚于竊取幸免恥于攘善自維桑榆景迫梨棗功艱強記日疎求正益切去夏同名錄竣工隨取是編重加排比付諸剞劂非敢規前人之過衡其所長庶逮聞大雅之言補吾所短若夫假以餘年益所新得此則區區之志所不能自必者也嘉慶七年歲在壬戌正月三日蕭山汪輝祖敍

元史本證五十卷

證誤廿三卷

證遺十三卷

證名十四卷

敘目終

元史本證卷一

證誤一

蕭山汪輝祖 男繼培補

太祖紀

歲癸丑汪罕父子謀欲害帝 案以上壬戌下甲子證之丑當作亥

復以汝案彈爲我祖忽都刺之子 繼培案忽都刺卽宗室表忽魯刺罕乃帝叔祖也

三年屈出律奔契丹 繼培案曷思麥里傳帝命曷思麥里

從哲伯爲先鋒攻乃蠻克之斬其主曲出律

卽屈出律

哲伯命

曷思麥里持曲出律首往徇其地抄思傳其先泰陽爲乃

蠻部主祖曲書律卽屈出律父敝溫太祖舉兵討不庭曲書律

失其部落敝穩奔契丹据二傳則屈出律被斬其奔契丹者敝溫也紀誤

六年十月耶律阿海降入見帝於行在所 案本傳歲壬戌

太祖與宗親大臣同休戚者飲辨屯河水爲盟阿海兄弟皆預焉是其降已久此時特見帝行在耳降字蓋誤衍

八年史天倪蕭勃迭率衆來降木華黎承制並以爲萬戶

案石抹孛迭兒傳卽蕭勃迭稱擢爲千戶錢氏大昕元史攷異

云案天倪傳亦云以萬戶統諸降卒而石抹孛迭兒傳但云擢爲千戶兩傳互異攷元初萬戶爲軍官最要之職太

祖時惟木華黎博爾朮爲左右萬戶納牙爲中軍萬戶此外雖蒙古世臣亦不輕授天倪輩漢人初附豈得便居此職則石抹傳云擢千戶者似爲近之元制除萬戶未有不賜金虎符者今據天倪傳是年已爲萬戶至甲戌始賜金符乙亥授副都元帥乃改賜金虎符則其初降必未授萬戶也

攷異又引木華黎行錄史氏慶源碑以非本史所有故不錄後皆類此

十年乙亥二月木華黎攻北京金元帥寅荅虎烏古倫以城降案石抹也先傳寅荅虎等乃東京守臣降在乙亥攻北京之前

十六年春帝攻卜哈兒薛迷思干等城攷異云薛迷思干

卽尋思干也上年五月已書克尋思干城矣何以此春又書攻下之豈克而又叛乎抑史文重出乎

宋漣水忠義統轄石珪率衆來降 案本傳降在庚辰乃太

祖十五年

十七年西域主札闐丁出奔與滅里可汗合忽都忽與戰不利帝自將擊之擒滅里可汗札闐丁逃去 案速不台傳

帝征回回國其主滅里委國而去命速不台追之滅里逃入海不月餘病死是滅里可汗未嘗被擒也但察罕傳稱

札刺丁

卽札闐丁

爲回回國主曷思麥里傳云札刺丁逃入於

海或速不台傳誤以札刺丁爲滅里亦未可知

二十年二月武仙以眞定叛殺史天倪董俊判官李全亦以
中山叛案此李全與據青州之李全別是一人董俊傳
稱治中叛在庚辰乃太祖十五年也此誤攷異云殆因次
年有李全執張琳郡王帶孫圍全益都事而牽連及之是
誤仞兩李全爲一人也

二十一年案年下失書丙戌

十二月李全降授張柔行軍千戶保州等處都元帥案字
魯傳李全降在丁亥張柔傳授千戶都元帥在乙酉紀並
誤

至大二年冬十一月庚辰加諡法天啟運聖武皇帝廟號太

祖 案武宗紀在十二月己卯

太宗紀

母曰光獻皇后 案后妃表當作光獻翼聖皇后

三年二月克鳳翔攻洛陽河中諸城皆下之 案下文云十月帝圍河中十二月拔之則二月未嘗下河中也

八年七月皇子闊端於東平府戶內撥賜 案食貨志歲賜當作東京路

九年丁酉蒙哥征欽察部破之擒其酋八赤蠻 案憲宗紀

亦以八赤蠻爲欽察酋長 地理志欽察作欽義事與紀同 攷速不台傳敗

欽察在太祖己卯平欽察在太祖癸未其征八赤蠻則在

太宗乙未距欽察之平已十有三年此以八赤蠻爲欽察酋長誤矣

憲宗紀

母曰莊獻太后 案后妃表至元二年追諡莊聖皇后至大三年加諡顯懿莊聖皇后后妃傳同此誤

六年高麗國王細嵯甫來覲 案高麗傳憲宗時國王名瞰此云細嵯甫疑是一人二名然傳無六年入覲之事

八年十一月進攻長獲山守將大淵降命大淵爲四川侍郎案大淵上脫楊字本傳長獲山作大獲城拜侍郎在己未冬乃九年也

世祖紀一

母莊聖太后 案后妃表及本傳當作顯懿莊聖

乙卯冬駐奉聖州 案至元三年方降德興府爲奉聖州此

誤

中統元年七月詔中書省給諸王塔察兒益都平州封邑歲

賦 案地理志永平路平州當作平灤

十二月賜先朝皇后帖古倫銀二千五百兩 案后妃表帖

古倫乃世祖大皇后不當云先朝繼培案此蓋太祖帖木

倫皇后之譌給其位下歲賜耳

二年九月以開元路隸北京宣撫司 案地理志開元爲路

在至元二十三年中統元年不得有此稱也十一月罷十
路宣撫司止存開元路誤同

世祖紀二

三年二月以興松雲三州隸上都 案是年十二月割北京
興州隸開平府四年五月戊子陞開平府爲上都庚子陞
上都路望雲縣爲雲州松山縣爲松州則此書以興松雲
三州隸上都者誤也是年四月以望雲松山興州課程隸
開平府而又先書免松州興州望雲州新舊差賦不自相
矛盾耶

四月禁征戍軍士及勢官毋縱畜牧傷其禾稼桑棗 案已